



数据加载失败，请稍后重试！

中國方志叢書·華中地方·第八四七號

據

清·張鵬翥等修，熊松之等纂
清同治十年刊本

影印

江西省

高安縣志

(五)

成文出版社有限公司印行

高安縣志卷之十七

敦行

唐

廖洪家貧事親孝大中九年父母俱亡捧土爲墳結草廬
居有青蛇白獸來止廬側旣而有雁中箭墮于前洪爲
拔其箭以藥治之經宿而去咸通中縣令朱郁上其事
詔旌

宋練爲長沙掾四世同居以孝行聞咸通中觀察裴休表
聞詔旌其門賜束帛

鄧文瑞四世同居五百餘口共爨長幼敦睦衣食無異開
元中表其鄉曰旌義今玉虛觀卽其故居

五代

沈麟字廷瑞性至孝友父彬死廬墓三年感慈烏集墓之

異

宋

胡仲堯字可宗華林人義居聚族雍熙二年下詔旌表仲堯詣闕謝恩授國子助教遷國子典簿

陳友直字溫叔赤土人紹興乙丑進士官至朝散大夫通判岳州性至孝父化光病涕泣繼之以血及歿廬墓三年足不他履時天降甘露羣以異聞直不許淳祐九年州守趙汝侓立祠祀之州學謚曰純孝姚勉有記

邱泰字義仲淳熙間父山疾篤泰割股以進尋愈轉運副

使趙彥操聞于朝孝宗御筆書付史館後更名高

劉貞字祥可貴才之子生而穎異善讀書勇于聞道清祐
壬子領江西解與同年姚雪坡同赴臨安居月餘作而
嘆曰人事如此天意可知遂假疾先歸明年姚大魁天
下而宋已不競矣前知勇退優游林泉自號竹林居士
臨安失守至元定鼎訪求耆碩貞以疾辭堅不赴議者
以身名俱全許之

元

吳啟孫字誠甫南城禮義坊人百口共爨九世同居堪與
陳氏家風媲美至大壬子郡守吳公益奏聞旌表義門
卒祀鄉賢正德八年郡守鄺公璠以族孫珏能世其美

復書義門遺澤以旌之

塗源字源叟北城人早喪父事母幸氏盡孝延祐三年除知黎州以母老不欲赴強之出至州聞訃徒跣奔歸既葬廬墓三年

熊師說二十七都岡下人讀書孝友不事進取家故裕值歲歉輒賙貧乏至元間撫州進賢饑告糴于其家發粟八十石賑之不受值其子志文克紹先志嘗出粟賑困及不能婚葬者人號之曰文山

陳天成字志升家少裕而能好禮創義學曰綠槐書院鄉黨宗族子弟貧而敏慧者聘師訓迪之仍給其廩餼曰之成名者甚衆閭里重之

冷齊賢喜讀書樂于爲善至正間出粟賑貧賴以全活者甚衆里有虎患行者股慄捐貲募善射者捕殺之鄉里感其德號曰春山

明

陳鉉字鼎立荷山人明初父舜舉轉運京師以逋稅繫罪所司鉉年十四馳至京盡償所逋脫父以歸又盜將發母塚鉉怵怵心動若有告之者疾至墓所盜驚散以爲神後子孫貴盛祥贍創皆躋八座

鄒貞字吾省桂林人洪武間父爲千戶長被誣拘刑曹待決貞年十三赴京擊登聞鼓願以身代得報就獄免父尋蒙恩宥減等發配甘肅衛軍後歸徵爲義勇千戶以

父邁謝冠終養僉憲敖和上其事

吳仲二龍山人親死廬墓三年詔旌其門

謝麟字秀瑞下十二都前港人太學生正德壬申華林賊劫其家麟負母踰垣以避賊追尋益迫家人速之走麟曰母在顧可棄乎旣而賊執其母麟奮力奪之母得逃免麟爲賊所殺

吳雲字曰寶號鳳坡北城妙高坊人爲府掾正德己卯從事別駕胡公署府事會儀賓李蕃李貴集叛黨助宸濠謀逆雲從胡公於石鼓潭擒之濠敗巡撫王文成公紀績奏聞奉旨免外考徑取赴京聽選雲以母老乞終養直指旌其孝恩賜冠帶族弟文端公贈聯云報國立功

忠義實由天性養親辭祿孝思不假人爲

吳民瞻龍山人永樂間僉爲千戶長管大木于湖湘督夫於閩地天順己卯歲歉輸粟助賑縣宰親詣其門奉旨立碑亭旌表尙義

徐會濟字碧泉徐坊人天順三年歲荒歉輸穀一千石賑贍饑者碭縣上其事題請建坊旌之給以七品冠帶

彭尙義米嶺唐源人天順四年輸穀一千石助賑題請賜坊旌表給以七品冠帶

吳琬字曰方龍山人父仁瞻性孝友敦風節琬克承先志積學勵行尊禮賢士周恤貧乏成化己亥邑大饑琬輸粟一千石助賑且爲粥以待無告者鄉里徵輸無力捐

貲代納不問所償巡撫金公澤題請暨坊旌表尙義郡
縣屢舉賓筵後嗣貴盛

劉源瀟好古勤學長于詩詞治家有法本縣官糧與民糧
均派起運百姓苦之源瀟問關四千里伏闕奏請以官
糧納輕折民困始蘇所著有蘇齋稿

鄒瀾字容暉桂林人孝友端方立家範十則大有條理五
子各營一宅創學田二百畝勸興來者宏治間郡守劉
公廉其行兩請賓筵生平汲古好學晚築一軒貯圖史
法帖以娛老匾曰蘭室傳文穆公爲之記

梁璧號方塘銅湖溪上人積學不求聞達重義好賢鄒南
臯謫戍璧千里走書餽遺慰問南臯手答云使公當路

吾道豈憂不行哉隆慶三年歲饑璧首捐粟三百石入義倉備賑郡守鄧公高其義稱方塘先生尤以才名重當時著有方塘集

劉公泰性孝友好施與成化庚子歲饑輸粟六百石助賑正德間年百歲副使李夢陽檄府立坊

吳斗瞻龍山人讀書明大義好善樂施成化己亥歲大歉助粟賑濟全活甚多邑令顧純以其事上聞撫軍金公澤奏請恩賜冠帶建坊旌表

鄭再廉米嶺江背人隆慶六年捐粟千石助賑縣令楊思明上其事題旌尚義

胡克安石街人篤學隱居歲凶出粟賑饑華林寇亂克安

身帥六子溥激潔漢深洙及里中義勇禦之寇獲其三
于潔兄弟五人偕前爭死寇義而並釋之寇平郡守胡
公旌其間曰忠義之門

朱以範號茶山社山人景賜元孫吾弼之曾祖也嘉靖甲
申納糧救旱戶部尙書王題請授以七品散官邑令重
其賢能委以釋民事稱平允華林盜起範督鄉兵助平
之居家孝友子姪均析其產人皆義之今登科甲者皆
其後嗣

張進字子與國學生嘉靖甲辰歲饑孺者載道進施粥以
濟郡守嘉其義後判沅州以良吏稱

張本榮楊文華嘉靖癸卯郡守許仁卿建修石橋選知義

者十人二人先之

朱崇遂號竹亭年二十棄舉子業潛心理學萬厯戊子邑中饑疫崇遂破產賑恤鄉里免流亡者二千餘家撫按欲上其事力辭早歲艱嗣鄉人禱曰朱某生平善行而終絕嗣乎未幾連舉二子朝綬朝縉皆擢才名多隱德曾孫軾爲大學士

幸國賢慷慨好義居家嚴肅孝友善於鄉遇荒捐賑周里德之二舉賓宴子姪能承其志勒名旌善亭稱世善

孟應乾城西人萬厯甲寅歲大饑輸粟助賑旌尙義名勒府縣碑記

傅友城西人萬厯十六年輸粟二百石賑饑太守章公潤

邑令李公磯匾旌

傅廣潤國學生珠湖人萬歷間值解南米捐貲三百徃省
部告折府縣旌其門曰尙義

後子孫餽膠庠登賢書皆
同詒謀之力

李應明西南廂人讀書好義每遇荒年出有餘以賜貧乏
巡按陳公于廷給匾旌之

劉廷興一都人高年善行萬歷間邑令陳繼昌給匾優獎
朱應洪正己長子性恬淡動遵禮法同母弟繼祖出守楚
雄諸子聯翩甲第人皆艷之洪獨卜築長溪之濱蓬戶
蕭然嘯歌自娛甚有隱德爲長溪始祖

陳樾字遠隆赤土人賦性端恪事父母備極孝謹尤友愛
諸弟嘗受易于丁竹山奮志力學數音不售時世宗下

採木之命于江南樾父竄以邑推行誼當行樾請以身
代不許竄獨攜僕走閩山遂觸瘴歸病故官錢半爲無
賴所侵沒樾痛父死于役徃任厥事至傾貲償費凡五
載暴露風濤始得報竣同事者多罹罪罟而樾獨課功
保業以終父志歲荒邑令以禮聘董賑事傾私廩以濟
全活甚衆不受冠帶後以子儒貴累贈中憲大夫

朱繼通性豪邁母龔氏早卒繼母鄔氏嚴而戾通與妻黃
曲意事之務得其歡心糾族合祠終其身不令里中有
訟常戒子司李必忠厚正直無爲我受一絲一粟後以
子吾弼貴贈太僕卿

吳勁字子松號晚翠南城禮義坊人痛母梁早寡膳養備

至行貨金陵時天寒會設羊羔酒動念慈闈潸然淚下
明日遊報恩寺誓斷酒肉及歸母病湯藥弗愈剗股肉
爲糜湯以進乃甦郡守鄺公匾其門曰節孝

朱達善字兼之教諭以和之子生而孝友教諭在沛達善
忽心動急馳至則母病甚日侍飲食晝夜勞瘁而母竟
不起哀毀過禮遂成羸病及父致仕歸達善問寢視膳
有古孝子風事庶母馬氏如所生其妻欲爲廣嗣買妾
羅氏女以憶母故悲愴達善卽日返之不索原聘他若
賑粟建橋置義田善行不一郡守嘉之舉鄉飲者五
況于杞字汝器幼以孝聞父母歿欲以身殉哀毀幾絕服
闋以明經將赴選冒雨哭墓遂抱疾以歿

劉緒祥字南屏一都人少以畊鑿起家足不入城市睦姻
任卹物望蔚起兄弟子孫並列兩庠多端士每庭集鬚
鬢皤然不辨昭穆年百歲視聽聰明待人謙遜士大夫
就問者疑有導引之術曰無一靜而已嘗舉鄉飲郡守
贈之曰盛世嘉賓

幸鳴鶴字徹元洪城人循循孝友無疾言遽色終身讀書
不事進取娛意山水著有瀆谷集方外襍錄編釋松垣
文集華林記畧補遺

吳一恂字惟德號仰泉南城禮義坊人文端公仲子也文
端請朱太母就養不得遲迴不行太母促之官乃詢諸
子誰代予晨昏者恂獨唯唯文端心喜旣行而恂以善